



Saunoaga o le Tala Faataatau Autu o le Tupe 2018/2019



Afioiga Hon Sili Epa Tuioti.
MINISITA O TUPE.

“Lau Afioiga i le Fofoga Fetalai, e tusa ai ma le Tulafono Tumau 131, e ia te au le ava tele ma le faaaloalo e tatau ai, e fai ai au ma sui o le Malo ou te tuuina atu se ootootoga o le Tala Faataatau Autu o le Tupe mo le tausaga faale-tupe 2018/19 i luma o le Laulau a Fono a le Palemene.

I. FAAVAE O LE TALA O LE TUPE

Lau Afioiga i le Fofoga Fetalai, i le tapenaina o le tatou folauga mo le tausaga faale tupe o lumanai, e tatau ona tatou tepa i tua ma auiliili taunuuga sa ausia i tausaga ua tuana'i, aua e tāua tele lesona mai mea na tutupu i tausaga ua tuana'i le tuana'i e faufau ai le lumanai.

Lau Afioiga i le Fofoga Fetalai, e lagona le agaga faagaetia ou te folasia ai i le maota nei, le tulaga mauaa o lo o i ai nei lo tatou tamaoaiga. E ui lava sa satia le tatou malaga i tausaga ua mavae i fitā ma faigata, peitai na maoae le siitia o le tamaoaiga i le tausaga 2015/16 lea

na oo atu i le 7pasene. Na mafua lea tulaga ona o le sii maualuga o le sao a le vaega o faiga faiva faapea le tatalaina o faletalimalo a le Aggie Greys i Vaisigano ma le Taumeasina Island Resort faapea taaloga faava o malo sa faia i Samoa nei. Na toe agai le tamaoaiga i lona faatupulaia masani ma ausia ai le 2.5% i le tausaga 2016/17.

O le tulaga mausali o le tamaoaiga na faavae i le pulea lelei o tupe a le Malo e ala i le fuafua tatau o tupe faaalu. Faapea foi le sao taua o faiga faavae tau tupe lea na tuutiitia ai le tau o le soifuaga i lalo ifo o le tapulaa sa fuafuaina. Sa mausali foi le faiga faavae mo feafaatauaiga ma ausia ai tapulaa fuafuaina o seleni mo feafaatauaiga. Mo le silafia e sui mamalu o le maota, o lea tulaga sa faamaonia e le IMF i lana iloilogaga o le tamaoaiga o Samoa ia Fepuari o le tausaga nei e pei foi ona sa faatinoina ia Fepuari o le tausaga 2017.

O le pine faamau lea o le taunuu lelei o faiga faavae sa folafola ma faatinoina e le Malo i tausaga ua sola ma avanoa ai seleni mo le faatupeina o auunaga o lo o manaomia e le mamalu o le atunuu.

Sa faatinoina foi e le Malo taunuuga o le Iloilogaga o Tupe Maua ina ia mafai ona ausia tupe maua faaopopo e faatupe ai galuega tetele faapea manaoga mo aoaoga ma le soifua maloloina.

II. VAAIGA TAULA'I I LE LUMANAI

Lau Afioiga i le Fofoga Fetalai, i le

» Faaauau itulau 4

Saunoaga Faa-Minisita

“...e leai, leai se faatulagaga i a tatou Faigamalo, e pasia ai e lenei Maota se Tulafono ma faamaonia ai e Le Ao Mamalu o le Malo ae toe liliu i ai se tofa ma se faautaga a se Faalapotopotoga ina ia faaleaogaina. E leai se isi fono e sili atu i le Fono lenei a le Palemene, i le faia o tonufai a Samoa, o le uiga lea e faaigoa ai le Fono lenei, o le Fono Aoa Fautulafono o le Malo Tutoatasi o Samoa...”



**Susuga Hon Tuilaepa
Dr. Sailele Malielegaoi.**
PALEMIA.

“Lau Afioiga i le Fofoga Fetalai ma Sui Usufono mamalu o le Palemene o Samoa faapea foi Samoa o lo o ua potopoto i lenei Maota ma Samoa o lo o faafogafoga tapuai mai, aua le paia o Aiga ma latou Tama, faapea foi le Usoga a Tumua ma Puleono i Salafai, ae a le tapuaiga a Auauna o le Talalelei o lo o taputapuai mai ma faanonomanu mo se manuia o Samoa.

Ou te faafetai i le alofa ma le agalelei o le Matai Sili i le lagi, o lo o malutapuaaoina ai pea le folauga a Samoa.

Ae ua ou tulai atu ma le ava tele lau Afioiga i le Fofoga Fetalai ma le Maota lenei, e fai sina au Tautalaga Faaminisita i le mataupu ua folasia i malae i le faaiuga a le Ekalesia Faapotopotoga Kerisiano Samoa po o le EFKS, sa teena ai le Tulafono, ua uma ona pasia e lenei Maota o le Palemene o Samoa, e faatulaga ai le faia o lafoga a tatou Faafegaiga. O se auala lea e faaoga e Malo uma o le lalolagi, e faamalasia ai le vavae e le Malo o tupe mai ia i latou e tele a latou tupe e fai ai galuega ina ia faalatelele atu le manuia i le lautele o le atunuu e laitiiti a latou foi mea e maua. Ona e aupito inosia e latou e tele a latou tupe lenei ituaiga faiga, o le ala lea e faatulafono ai e le Malo nei mea o lafoga. Aua afai e le faatulafonoina ae lafo atu i le loto faitalia e fai ai saofaga a tagata i galuega fai a lo latou Malo mo latou e le maualuga lo latou tamaoaiga, e atili tupu ai le va o e maumea ma e matitiva.

O se mataupu faigofie tele, faigofie, ae ua soona faanefu e nisi ua lalafi ma ta'uta'u ai fua le suafa paia o le Atua, e tau faamalumu ai se solitulafono.

Lau Afioiga i le Fofoga Fetalai, e taua tele

le taumafai mulimuli atu lenei a lo tatou Malo e toe faamalalalama le mataupu lenei, ona e ui lava ina 56 tausaga talu ona tutoatasi lo tatou Malo o Samoa, ua faavae foi i le Atua, o lo o faalagolago i lafoga e faatino ai ana galuega fai, ae aliali mai e i ai lava i latou e le fia malamalama i le uiga ma le faataatiaga o tatou Faigamalo, po o le musu foi e fia malamalama, ina ia saofaga ai pea le soifua olaolanoa, e le faia ai ni o latou sao i le atinae o si o tatou atunuu vaivai o Samoa.

O le taua o lenei faamalalalama a lo tatou Malo, e le o se Malo fefoifoiai, e le o se Malo foi e femoumuai ina ia manino ma nofouta ai foi i aulape ma taunuuga, e tulituliloa ai e lo tatou Malo lenei mataupu e pei o le masani a Malo uma o le lalolagi. Mai lava i le tausaga foi na soifua ai lo tatou Alii Faola i lenei lalolagi, sa lagalaga ai lava le mataupu lava lenei o lafoga. Ae o le uiga lava foi lea e tasi ua toe savavali ai foi nisi i le aualatele e faali o latou finagalo tete e se tasi foi o Tulafono e aofia ai lava ma le Faavae o le Malo o Samoa, o lo o malupuipua ai Fanua Faale-Aganuu mai lava i le amataga o le tatou Malo Tutoatasi, se i tau mai lava i lenei vaitau. O lo o mautinoa e leai, leai se Faigamalo malamalama i lenei lalolagi e faatali ni ana polokalame mo le manuia lautele o tagata, se'i muai faamalicia i se fuafuaga a se ekalesia ona faatoa fai lea.

O le mea moni lau Afioiga i le Fofoga Fetalai, afai e faapea ni Faigamalo, e uma

» Faaauau itulau 3

Mataupu o le Lomiga

1. Fonotaga a le Faalapotopotoga a Sui Faipule mo Atinae Lelei 02
2. Faiga Lotu a le Ofisa o le Fono Aoa Fautulafono 02
3. Iloilogaga Faaauau a Komiti Faa-Palemene 03
4. Faatalalanoaga ma le Konesale mai Ausetalia 07
5. Lipoti a Komiti Faa-Palemene 08 - 17 & 25 - 28
6. Aso Taalo mo le Ofisa o le Fono Aoa Fautulafono 18 & 19
7. Tulimanu mo Tamaiti 20 & 21

8. Malaga a Sui Usufono i Saina 24
9. Aotelega o le Fonotaga a le Palemene 29
10. Tulafono Tau Faaofi na Faaofia 30 - 36
11. Aufaigaluega Fou & Faamavae 36
12. Galuega Faagasolo a le Fono Aoa Fautulafono 37
13. Fonotaga & Polokalame Faale-Aoaoga mo Sui Usufono 37
14. Tuumalo o le Afioiga i le Sui o le Fono o Sui Tofia 39
15. E Manatua Pea 40

